

定鄉小識卷八

錢塘張 道少南

山水記 八 曇山路

湖步東路南出爲洞子山爲董家青山爲堂
芝塢爲石牛灣爲雞籠山爲小嶺又傍石龍
而南爲蔣波山爲獅子山爲姚家塢爲陸家
嶺爲豬孃山爲花山山麓爲花山嶠西爲曇
山有仙人洞有石鼓有丹窟有棋枰石有石
浴室北爲小嶺南爲饅頭山又花山南古有
明聖湖宋爲石湖今爲銅鑑湖又南爲瓜藤
山

定鄉小識卷八

一

山爲筆山又南至湟橋爲虎頭山爲挂榜山
出公館山爲解頭山有公館井又東爲鯉魚
山
洞子山 康熙錢塘縣志郡志在西塢山東五里又
東二里接廟山

山在湖步東與楊梅隴東西相對去廟山甚遠
郡志說非

董家青山 在湖步東

堂芝塢

石牛灣

雞籠山 在湖步東

小嶺 在雞籠山東爲石龍山初起處可達滕村

蔣波山

獅子山

姚家塢 在湖步東

鄭永祺

春盡日游姚家塢

緩步徐吟過小橋飽收春景只今朝田翻麥浪流
雲去風約鶯聲逐絮飄數點落花浮水面幾家茅
屋襯山腰眼中正戀韶光好無那東風別柳條

定鄉小識卷八

二

陸家嶺 在湖步東

豬孃山 在陸家嶺南

花山 在曇山東宋鄭次山築園亭於曇山種花於
此故名

花山嶠 在花山麓與曇山連腳處

曇山 曇山作 萬厓錢塘縣志石龍山之支東南行爲

曇山四圍皆石玲瓏秀巧康熙錢塘縣志曇山一
作曇山郡志在西山東二里山石玲瓏北有小嶺
達定南公館

宋咸愷志云曇山在錢塘縣去城五十里近廟

山在楊村有慈嚴院夢梁錄云楊村曇山慈嚴寺之後名風水洞皆誤以雲泉山爲曇山而曇山則未著錄也山在雲泉東二里卽郡志所云西山東蓋雲泉俗呼西山也山東南面微有土餘盡石峯奇秀靈巧如樓閣人物仙禽怪獸者莫可繪狀皴皴瘦透巖穴百出雖雲林畫幀未殫其秀傑也湖上諸山惟飛來峯香林瑞石山差堪伯仲蓋石龍聳拔奇峭靈氣旁洩故曇山以花山爲禰而酷肖其祖形如蹲獅山石上有纜痕深刻數寸相傳昔時山岸瀕江帆檣上下

定鄉小識卷八

三

負纜所過處宋鄭次山曾築園亭於此石間階級遺跡尙存朱文公兩游曇山題名石上

朱文公

題曇山

頽然見茲山一一皆天作信手銘巖牆所願君勿鑿

右詩在曇山棋枰石側磨厓甚低字跡猶彷彿可讀此公初游曇山時作故有頽然忽見之意萬厓錢塘縣志引文公紀事紹熙甲寅題名下云晦父因題石上云云則以此詩亦爲甲寅作

矣且以信手作起句於詩語便索然其譌不待
辨而明也稱公爲晦父亦非君者鄭次山也

仙人洞

一名清
虛洞

在曇山萬厯錢塘縣志曇山有仙

人洞洞門石闕一石從空駕其上

洞在曇山西廣丈餘高約五丈許洞口雙石侍
立如門入門徑凡三折長五十餘步石厓撐覆
形如厂宇洞上石笋橫眠孤擎俯仆約十餘丈
若伸長臂游人仰睇驚將墮壓上有紹熙三年
磨厓篆書清虛洞天四字當爲鄭次山輩所題
一石孤圓駕空風吹欲墮洞外石壁卽朱文公

定鄉小識卷八

四

題名處

沈九如

字宣子錢塘人著七柳軒集

仙人洞

峭壁橫江浦陰厓望或開石門懸雨露玉洞鎖風
雷每憶乘騾去時聞跨鶴回金丹求道至彷彿見
蓬萊

吳棠禎

仙人洞

石室神仙窟曇山尙未歸笑迎三雅爵長見五銖
衣大火留丹竈春雲守釣磯高空有笙鶴重與叩

巖扉

石鼓 在仙人洞內萬厯錢塘縣志仙人洞內空明有石鼓

洞內又有石床石几諸勝皆仙跡也石鼓康熙錢塘縣志入古蹟

丹窟 在曇山仙人洞側萬厯錢塘縣志仙人洞旁有小窟奇石空洞康熙錢塘縣志曇山有丹窟去仙人洞數十武有石室廣五丈餘高二丈餘中可坐十數人相傳仙人鍊丹於此俗亦呼爲仙人洞魏氏志人古蹟

定鄉小識卷八

五

棋枰石 在曇山朱文公題詩處平砥可弈棋左右石磴有凹可二人對坐疑爲鄭次山園亭中遺蹟也旁有石危立皴瘦如畫

石浴室 在曇山石形如竈有窪如釜相傳仙人澡浴處

小嶺 萬厯杭州府志在曇山北東達定南公館饅頭山 在曇山南孤突低圓四圍皆田

明聖湖 宋時名石湖今名銅鑑湖 劉道真錢塘記明聖湖在縣

南父老相傳湖中有金牛古嘗見其映寶雲泉照曜流精神化莫測遂以明聖爲名水經注錢塘縣

南江側有明聖湖父老傳言湖中有金牛見神化不測湖取名焉咸淳臨安志明聖湖劉道真錢塘記云湖在縣南二百步父老相傳湖中嘗有金牛見遂以明聖爲名酈道元水經注此湖在縣南江側又仁和縣東十八里亦有明聖湖崇雅堂詩集注按趙誠夫東潛文稿西湖非明聖湖辨據水經注咸淳志定以武林水爲西湖而明聖湖別在錢塘定山南鄉其駁正成化府志之謬卓然可信然於所著水經注釋及刊誤均不載此說豈因駭俗削之歟

定鄉小識卷八

六

明聖之強屬西湖久矣趙氏創辨其非胡氏續伸其說其定鄉雜咏有強把西湖號明聖靈蹤誰訪定南鄉之句見駝爲馬腫背聞者不無駭然然據縣南江側之語西湖古不通江田氏游覽志及毛稚黃己力辨之則湖之在定南瀕江處信矣今父老相傳言曇山有金牛大霧則見蹊田齧禾蹄跡宛然湖去曇山僅半里許神物耀靈容或有之況錢塘記云映寶雲泉照耀流精雲泉者風水洞山卽俗呼西山者也雲泉與湖東西踞勝金牛寶氣光映是山矣趙氏之說

洵非虛也夫湖西之山尙號雲泉湖旁之地猶名湖步則銅鑑湖卽石湖石湖卽明聖湖確有明證要非強爭矣乃翟氏踵李氏志於西湖引水經注下竟云湖一名金牛一名明聖湧金門卽金牛出見之所且云咸淳臨安志但云舊名錢塘湖不知尙有武林水錢水錢湖明聖湖金牛湖及龍川錢源諸名在矣豈未見趙氏文耶夫湖步自曇山水洞而外古皆傍江是以錢塘記僅云縣南水經注確指江側至咸淳志引記文於縣南下增二百步三字考六朝縣治在靈

定鄉小識卷八

七

隱如縣去湖僅二百步則瀕湖甚近何以處靈隱諸山之互隔也蓋潛氏不知石湖卽明聖湖故卷中又別出石湖而於此處第引舊文弗加論斷可知湖在宋時其隱晦已如此然其不爲西湖則確也若所云仁和東之明聖湖疑卽葛澧錢塘賦中之明星湖星聖轉譌形聲悉近而魏氏錢塘志誤會是文又似知石湖之爲明聖者遂云石湖在南鄉仁和界鞞鞞模糊何以信今傳後耶

趙

一清

字誠夫號勿藥一號小林
仁和人著有東潛文稿

西湖非明聖湖辨

今上御極之六年制府彭城李公以西湖歲久葑合其旁且占爲私田顧錢盡拓其舊水利用興亭榭花木百度煥新事無留難役不煩擾又以

先皇翠華所曾巡幸請

敕奉

行宮爲衣冠游廟

御書聖因寺額志乘弗備懼無以昭示後世遂開館於南樞關署敦禮魁儒碩學主其事余以謫材謬膺授簡分得藝文物產寺觀詩話四門草創略就公適

入

觀京師而志事遷延未卽上於時有謂西湖卽故明聖湖者考漢書地理志錢塘西部都尉治武林山武林水所出西湖之源實出南北諸山溪谷縷注下有淵泉百道瀦而爲湖則武林水卽西湖也舊名錢塘湖白文公詩湖號錢塘瀉綠油者亦曰上湖見於石記未聞別有所名自成化杭州府志作而明聖之名乃強加矣蓋吾杭郡志宋有圖經南渡後以臨安府爲行在所周淙撰乾道志僅存三卷施愕撰淳祐志今失傳傳者惟潛說友咸淳志百卷而已明洪武初

天台徐大章一夔爲郡學博士始克修之以簡明稱美繼是永樂景泰正統三朝皆有成書竝散亡無可考成化十年夏太常時正復修爲卷六十有三田副使汝成輯西湖游覽志頗徵引其書而不知書之多誤也按成化志云西湖在郡西劉道眞錢塘記云西湖在舊縣南二百步父老相傳湖中嘗有金牛見名明聖湖後以在郡西遂名西湖亦名錢塘湖源出於武林泉周迴三十里考之咸淳志則云西湖在郡西舊名錢塘湖源出於武林泉周迴三十里在三十卷余初訝其脫略卒讀之又云明聖湖劉道眞錢塘記云

定鄉小識卷八

九

湖在縣南二百步父老相傳湖中嘗有金牛見遂以明聖爲名酈道元水經注此湖在縣南江側又仁和縣東十八里亦有明聖湖在三十卷不禁快然曰誤在是矣夫成化志旣襲用咸淳志宜乎不改其舊而竟鈔變其辭遷就已說卷帙不相屬條目不相貫何鹵莽滅裂之甚耶乃前人旣徇名而失實後人復文過而遂非一誤再誤伊於胡底如游覽志總序云西湖故明聖湖也漢時嘗有金牛見湖中人言明聖之瑞遂稱明聖湖夫以父老相傳之陳迹而確然指爲漢時以神化不測之荒詞而公然詡爲瑞事未知出何

紀傳是何年月迄今二百餘載莫覺其非或致難曰
惡是何言也是出水經注者也而何敢重非則請申
水經注之文可乎注云縣南江側有明聖湖父老相

傳言湖中有金牛見神化不測湖取名焉

按劉道真錢塘記曰明聖

湖在縣南父老相傳湖中有金牛古嘗見其映寶雲泉照曜流精神化莫測遂以明聖為名鄺氏所引蓋

出於此也縣有武林山武林水所出也

此語全本班志

觀其文義

自縣南江側至湖取名焉為一節縣有武林山云云
又為一節注分著明聖湖與武林水而必欲混為一
區尤可怪也或曰子之說甚辨然明聖湖今無其地
烏知湖之近南一方者非其故址乎余曰果如若言

定鄉小識卷八

十

則明聖湖不過與孤山路水心寺分西湖之片段
奇耳猶之宋時嘗建德生堂以湖為放生池不可云
西湖一名放生池也明孫山人一元泛舟湖上舉酒
屬客曰此可名高士湖矣未得云西湖故高士湖也
倘明聖之地合并於西湖作書體例咸淳志但當牽
連附見奚用二卷分列為此喋喋者哉然則明聖湖
究在何所曰在錢塘定山南鄉

定山南鄉有沙蕩湖步滕村分金四里見

咸淳志吳自牧夢梁錄云定山南鄉有名湖劉道真錢

塘記云明聖湖在縣南二百步定山一名獅子山太
平寰宇記云突出浙江數百丈萬厓杭州府志云在

錢塘江口去縣治東南四十里按當是十里之誤是與縣南江側一語正相脗合迤邐而西尙阻月輪山五雲山龍山南屏九曜諸山踰嶺越澗直須五丁之手以通此一綫西流之水也有是理乎或又曰成化志之誤亦因郡有金牛湧金二池皆與西湖水脈相通遂借水經注金牛見湖之事以爲佐證耳殊不知金牛池乃唐六井之一而湧金池又吳越守將曹杲所鑿文穆王特賜此名親書刻石總與明聖毫無關涉使早知仁和縣東亦有明聖湖則瑞應亦屬尋常必不羨此佳名以自蹈無稽之咎矣且成化志之說最叵信

定鄉小識卷八

十一

其志水利云西湖莫詳何始唐宋之間靈隱寺詩門對浙江潮是時靈隱山址猶潮汐之地迨李泌刺杭州以城中水鹵惡引西湖水爲六井以便民汲以此觀之杭之有西湖其在之間游靈隱之後泌刺杭之前乎紕繆若此真同嚙語而猶奉爲典型垂爲掌故何夢夢也況自三唐兩宋歷元以迄於明初白蘇二公外歌詠此湖者人不下數百家詩無慮數千首又如白廷玉之二賦文成數千言曾有一字一句之及明聖否葛澧錢塘賦云城之外有西湖焉又云湖則御息明聖陽陂臨平南上南下明星建寧其特舉而

類列者固昭昭也惟南宋人周煇作清波別志載同時許仲啟云酈道元水經注錢塘湖本名神聖湖自炎祚中興高宗嶽狩於此及議諡號遂帶此二字夫水經注何嘗有錢塘湖本名神聖之文且又易明聖爲神聖以強合於帝王之諡號小說家之妄誕無徵類如此試觀元和郡縣志太平寰宇記元豐九域志方輿勝覽輿地廣記夢梁錄武林舊事乾道咸淳兩臨安志考核精審奚至紛紛擾擾明湖聖湖爭以新奇互相標榜總因咸淳志一書編簡浩繁寓目者少是者恨不復傳而傳者往往失其所是今年冬書

定鄉小識卷八

十二

旣勒成將以廣其傳苟默焉不一伸其說俾後之覽者摘其所誤於前人者而訾笑之則余之懼滋大矣李氏西湖志成於雍正十三年辨蓋是時作也趙氏因志有云西湖古稱明聖湖漢時有金牛見湖人言明聖之瑞因名而凡例中且云考漢時金牛見湖瑞應明聖 國朝鼎興重熙累洽恭逢聖祖仁皇帝軫念蒼黎屢舉省方之典

巡幸至浙駐蹕湖山明聖之瑞昭然千古其言未免因成化郡志游覽志而更爲附會故特作是文以破積譌援據明確辨駁雄偉數百年來隨聲附和

之習一埽而盡然猶有誤焉者蓋趙氏據夢梁錄
定山南鄉有石湖之語斷以明聖屬定南又以定
山標鄉之故遂以明聖屬定山而臚引太平寰宇
記萬厯郡志之言定山者以實之爲與縣南江側
一語相合不知宋時定南所轄地境四散不相聯
屬如湖步在石龍西今屬安吉滕村在石龍東今屬長壽沙
蕩爲瀕江地今屬定南安吉分金在白沙塢北近餘杭界
今屬長壽非皆附麗定山者卽定山特總轄之主名實
不與湖近惟湖步舊緣石湖得名趙氏知石湖卽
明聖而不知石湖所在強坐定山總由非躬親厯

定鄉小識卷八

十三

覽故仍鶻突耳又夢梁錄石湖誤作名湖萬厯郡
志云定山去縣治東南四十里其言東南當作西
南而道里頗合乃云當是十四里之誤又月輪五
雲諸山在定山東而云迤邐而西考據均爲未的
石湖 咸淳臨安志石湖在定山南鄉夢梁錄錢塘
定山南鄉有石湖石一本
作名 譌康熙錢塘縣志又有石
湖亦在南鄉仁和界崇雅堂詩集注按石湖今無
考惟定南沿山一帶有地名雙漣雙漣之西南近
楊村有地名白森春水時至沮洳彌望定鄉恆苦
旱而是里獨病於潦或卽石湖舊址歟證以趙氏

在定山南鄉之說亦合

石湖以在石龍山下故名趙誠夫所云定山南鄉之明聖湖卽此魏氏志不知何據增仁和界三字定鄉四境無與仁和鄰者也胡氏知石湖之爲明聖湖而不知銅鑑湖之卽石湖因以雙漚白森當之夫雙漚卽桑柳今俗作雙流在凌溪東象山下白森卽白漚在外板橋村南乃瀕江地名今爲江潮衝齧殆盡去楊村五里去桑柳約二十里今舍眼前之湖而強指虛遠之地良猶耳聞臆揣非親踐履故也然胡氏詩云湖

定鄉小識卷八

十四

步名猶舊里呼靈泉此日耀靈無則知是湖之近湖步而其下乃云地尋白森還雙漚何處漚泓是石湖卽自注石湖無考云云不更矛盾耶

銅鑑湖 在湖步口近漚橋東距石龍山下之陸家嶺南北山腳插入湖中惟西岸當兩山舒豁爲湖口居民築隄自南訖北以插湖水湖周回約三四里水灌漚橋阪田旱涸無憂至今賴之湖水清澈產魚極肥菱芡之利不可籌計秋蕪尤佳埒於湘湖湖藏山腹境絕幽邃煙鷗雪鷺伊軋唼呷飛浴於蘋花荻笋之間終日不絕茶歌樵唱激響晴波

紅樹青林一川如畫惜乎窮村僻隴游賞罕經雨
漱風汀寂寥終古矣湖在漢時名明聖湖南宋更
名石湖湖步里以是湖得名湖底不甚深而泥鬆
善陷俗名香灰泥與西湖同

瓜藤山 萬厯杭州府志在白巖東迤邐而來羣峯
起伏勢若瓜藤高四十五丈萬厯錢塘縣志茱萸
尖之支東南行爲瓜藤山康熙錢塘縣志在白巖
山東高十五丈迤邐而下羣峯起伏勢若瓜藤

山在白巖山西石龍山小嶺南似卽湖步東路
諸山然自瓜藤而筆山而解頭而鯉魚據舊志

定鄉小識卷八

十五

某山在某山東鱗次排序似又在銅鑑湖南路
諸山姑存以俟考

筆山 康熙錢塘縣志郡志在瓜藤山東高十五丈
虎頭山 在瀆橋庵後

挂榜山 在瀆橋近公館山山岡平畫如張榜故名
解頭山 古名界頭
今名公館 萬厯錢塘縣志石龍之支東南

行爲解頭山有解頭寺康熙錢塘縣志郡志在筆
山東高三十丈有解頭寺傍有定南公館

解爲界之譌以在界石山頭故名界頭其寺卽
定明寺古界石院也今移建鯉魚山麓明時山

下有定南公館是山遂名公館山矣
公館井 在公館山下井水清甘大旱不涸汲以烹
茗不減龍泓虎跑定鄉山居者取汲溪澗瀕江者
汲飲浦漉井泉特稀惟此爲一鄉之勝

鯉魚山 萬厯錢塘縣志石龍之支東南行爲鯉魚
山康熙錢塘縣志郡志在解頭山東半里高八丈
萬厯志云在瓜藤山東回環十八里

山甚低小孤懸無麗郡志八丈之說信然回環
約僅二三里非有十八里也山面向西處今有

定明寺